

# UL MESANEL

*Patati ga ne tanti  
ma quei da Uren!!!!  
Sarà la tera sarà ul rion  
ma quant ghera Lia dal Pulvara  
ul Giarlot ul Busot e Francesc dal Lion  
Vendevan i patati bon.*

*Partivan da Uren ala matina prest  
i so girr eran Brughe Munsa  
La Santa e Cuncures.  
Turnavan a la bas  
magari strac dal vusà can fa  
però eran sudisfà.*

*A chi mument là parli da 40 o 50 tan fa  
i patati sa fasevan minga in sci gros.  
Ul mesanel lera ul puse ricercà  
perchè al druavan da fa  
la minestra o ul stuà.*

*Cunt quei gros fasevan ul purè  
e i rualet quei piscinet  
fasevan coss e ia schisciavan  
in dal mastel per fa ul panatel  
da dac al purcel.*

*Una volta la pulvra ai patati  
ga la davan no  
perchè la dorifera la cunusevum no.  
Ma pena finì la guera è ruà i American  
e man fa sta sorpresa  
inscè la dorifera a Uren la se truada in un giarden.*

*Ades i patati i paisan ai ragoian puse gros  
e cume ripeti Ul nost paes da Uren  
sarà la tera o ul rion ma i nost patati in propri bon.  
E quant ai tovuf catè fora i Mesanei  
ca in i pusè bon e pusè bei.*

*Francesco Lissoni 1985*